

մանր իրերի, կերակուրի համար, շատ սակավ դեպքերում, ավելի ընդարձակները՝ ցերեկը անկողինները դարսելու համար: Սովորաբար վերջին նպատակին ծառայում են պատերի տակ հատակից բարձրացրած հողի տախտեքը, որոնց վրա երբեմն անկողինները փռվում են խսիրի կամ գորգի վրա: Քարանձավի մեջն է դեռեղված և՛ ցորենի ու ալյուրի ամբարն, և՛ ամբողջ տնային գույքը, երբեմն նույնիսկ երկրագործական գործիքները, որովհետև այդ բնակարանները մեծ մասամբ բակ չեն ունենում: Լույսը ներս է թափանցում դռան գլխին բաց թողած փոքր լուսամուտի միջով: Հազվագյուտ են այնպիսի քրատակները, որոնք պատերի մեջ բաց արած ունեն հատուկ անցքեր՝ լույսը ներս թողնելու համար: Այն քարանձավներում, որոնք փորված են բուրգերի մեջ կամ ձորակողի այնպիսի մասերում, որտեղ բարձրադիր ժայռերի վրա կանգ է առնում անձրևաջուրը կամ ձյունը, անձրևից հետո և ձնհալքի ժամանակ առատաղի վրայից սկսում է ջուրը կաթկթել, և առանց այն էլ շատ զգալի ներսի խոնավությունը սաստկանում է: Այդ մութ և խոնավ բնակարանում հյուծվում էին և՛ հասակավորները, և՛ մանուկները: Ոսկրացավը դառել էր համատարած երևույթ:

Քրատակները փորված են լինում երբեմն այնպիսի բարձր տեղերում, որ անհնարին է լինում այնտեղ հասնել լեռան կողին կտրտված աստիճաններով: Մինչև այսօր էլ այսպիսի դեպքերում վեր ելնելու համար դիմում են պարանի օժանդակության: Դրա համար քարայրի մուտքի շեմքին շեղ ամրացված է լինում գերան, հատակից մի փոքր բարձր: Բարձրացողը պարանի ծայրին կապում է բար կամ երկաթի կտոր և այդ ծայրը ձգում է վեր, այնպես, որ դիպչի գերանին և վրան փաթաթվի, ապա լավ ստուգում է, թե պարանը որքա՞ն ամուր է փաթաթվել, և սկսում է վեր ելնել՝ բռնելով պարանից և ոտքերը հենելով լեռնակողին՝ ժամանակի ընթացքում գոյացած ոտնատեղերին: Հաճախ նա ելնում՝ իջնում է մի ծանր բեռ (ֆոց, կապօց), երբեմն էլ երեսա շալակած, վերելքի այդ ձևն ապշեցրել էր 1735 թ. Աբրահամ Կրետացի կաթողիկոսին, երբ նա Թահմաղ-Ղուլի-Նադր-խանին շահ հայտարարելուց և սուրն օրհնելուց հետո Մուղանի դաշտից գնում էր Տաթև, այնտեղից Մեղրու վրայով՝ էջմիածին վերադառնալու համար: Իր ճամփորդության նկարագրության մեջ նա գրում է՝

«Եկի ՚ի գիւղն Խնձորեկ (Խնձորեսկ), որ է ՚ի մեջ քարածեռ լեռանց մեծամեծաց... և իջանք ՚ի մէջ ձորոյն և տեսանք հիանալի բան... ՚ի բարձրաբերձ տեղիս՝ յայս կողմն և յայն կողմն ձորոյն՝ դէմ յանդիման միմեանց փորեալ յապառաժ վէմս՝ քարայր՝ որք են մաղաքայք, իւրաքանչիւր ոք վասն իւր տան բնակութեան շինեալ բնակէին. և այն իսկ էին զարմանք՝ որ կաշէ փոկով ելանէին և իջանէին. կանայք՝ զտղայս ստնդիացս կապեալ ողին իւրեանց, նույնպէս և զսափոր ջրոց և այլոց հարկաւոր իրաց, և նույնպէս փոկով ելանէին ՚ի վեր, և մտանէին ՚ի բարձրագոյն որջս վիմաց, և քաշէին զփոկէ առաստանն ՚ի վեր, որ այլ մարդ ոչ կարէր մտանել»¹⁰:

Քարայրներն ընդարձակելու համար հնում դիմում էին դալանների օգնության: Դա քրատակի առջև տաշած քարով կառուցված թաղակապ պատշգամբ է, որն երբեմն հենված է լինում հենց լեռնակողի ժայռի վրա, կամ հատկապես

¹⁰ Աբրահամ կաթողիկոս Կրետացու, Պատմագրութիւն անցիցն իւրոց և Նատր-շահին պարսից, Վաղարշապատ, 1870, գլ. Խէ, էջ 74: